

Listovi gračaničkog kalendara od 28. 11. 2005. do 9. 5. 2006. godine

OMER HAMZIĆ
.....

28.11.2005.

**Jedanaesta sjednica Općinskog vijeća:
otvorena javna rasprava o Nacrtu strategije
ekonomskom razvoju općine, usvojen nacrt
Budžeta za 2006., izvještaj o realizaciji
Projekta toplifikacije**

Uz ocjenu da se Program toplifikacije grada Gračanice realizuje po planu, usvajajući Izvještaj o dosadašnjoj realizaciji tog programa, vijećnici su usvojili zaključak da se odmah pristupi pripremama za osnivanje pravnog subjekta koji će biti nosilac projekta toplifikacije.

Osim ovih pitanja, razmatrana je i, uz izvjesne primjedbe, usvojena Odluka o utvrđivanju platnih razreda i koeficijenata za plaće rukovodećih i ostalih državnih službenika i namještenika organa državne službe općine Gračanica, zatim Informacija o problemima i aktivnostima na sprečavanju upotrebe opojnih droga na općini Gračanica, te Plan održavanja prohodnosti puteva u mjesnim zajednicama na području općine Gračanica u zimskom periodu.

10. 12. 2005.

Zolje (Lukavica) na asfaltu...

Zvanično je pušten u saobraćaj put kroz

tu mahal u dužini od oko 1000 metara. Vrijednost radova oko 90.000 KM. Vrijedni mještani obezbijedili više od polovine. Na redu je dio puta od Ograđenice do Prnjavora...

17. 12. 2005.

...i Golačevići u Malešićima

Asfaltirano je i pušteno u saobraćaj blizu 2300 metara asfaltnog puta kroz najveću mahal u Malešićima. Uloženo je više od 200.000 KM. Izvori sredstava: dobrovoljni prilozi građana preko 50%, budžet općine Gračanica i Kantonalna direkcija za puteve. U proljeće se gradi još kilometar puta koji će ovu mahal povezati sa centrom Malešića.

23. 12. 2005.

**"Gračanički glasnik": promocija
dvadesetke...**

...privukla je zapaženu pažnju čitalaca i saradnika časopisa, koji ove godine obilježava desetu godišnjicu svog izlaženja. O njegovom izuzetnom kulturno-historijskom značaju i ostvarenim dometima u proteklih 10 godina govorio je prof. dr. Azem Kožar, šef Odsjeka za historiju Filozofskog fakulteta u Tuzli, a 20. jubilarni broj predstavio je prof. dr. Enes Pelidija, prof. Filozofskog fa-

kulteta u Sarajevu. U sklopu promocije, u BKC Gračanica otvorena je izložba slika sa Trećeg bijenala minijature BiH, koje je nedavno održano u Tuzli. Odabrani radovi sa tog bijenala čine "likovnu opremu" 20. broja "Gračaničkog glasnika". Izložbu je otvorio akademik Enver Mandžić, prof. Rudarsko-građevinskog fakulteta u Tuzli.

27. 12. 2005.

**Dvanaesta sjednica Općinskog vijeća:
2006. godina u znaku izgradnje putne
infrastrukture i toplifikacije**

Usvojeni su: Budžet Općine za 2006., izvještaji o radu u protekloj i programi rada za 2006. godinu Općinskog vijeća i Općinskog načelnika u 2005., programi rada, odluka o zaduženju Budžeta u iznosu do 3,5 miliona KM na 5 godina u svrhu izgradnje putne infrastrukture na općini. Radi se o značajnim programskim dokumentima, koje je nakon dugotrajnih rasprava, ipak, u predviđenom roku usvojilo Općinsko vijeće, kao osnovu za "normalan start" općinske administracije i ulazak u značajne kapitalne projekte planirane za 2006. godinu.

Budžet općine za 2006. godinu planiran je u ukupnom iznosu od 9.900.000 KM, a sastoji se od: poreznih prihoda u iznosu od 4.005.000 KM, neporeznih prihoda u iznosu od 2.025.000 KM, tekuće potpore (grantovi) 1.015.000 KM, što ukupno iznosi 7.045.000 ili za 9,6% više u odnosu na prethodnu godinu. U Budžet za 2006. godinu ulaze i primici od domaćeg zaduživanja, po posebnoj odluci Općinskog vijeća, u iznosu od 2.855.000 KM, iz kojih će se, uz sredstva predviđena budžetom, finansirati otplata zaduženja do 3.500.000 KM u narednim godinama za izgradnju putne infrastrukture na općini. Riječ je o jednom od najvećih projekata u oblasti komunalne infrastrukture na općini poslije Dejtona. Sredstva će se trošiti prema posebnom planu kapitalnih ulaganja po mjesnim zajednicama,

16. 1. 2006.

Umro Rizo Suman

Riječ je o uglednom Gračanliji (rođen

1926.), čije je ime trajno vezano za privredne prilike na području općine Gračanica od ranih šezdesetih godina, pa sve do 1992. godine. Jedan je od najuspješnijih predsjednika, koji su bili na čelu općine Gračanica u periodu poslije Drugog svjetskog rata. Ostavio je neizbrisiv trag u "biografiji" nekoliko nosilaca privrednog razvoja općine Gračanica kao što su: Fabrika obuće "Fortuna" (čiji je osnivač), zatim Ciglana "Sočkovac", "Građevinar", "Ozrenka"... (opširnije u rubrici "Likovi zavičaja" u ovom broju Časopisa).

20. 1. 2006.

Izbor sportiste godine za 2005.

Za najbolje u pionirskoj konkurenciji proglašeni su Muamera Mehinbašić (Karate klub "Gračanica") i Alem Ibrahimović (Karate klub "Dado Alić" Miričina); u kadetskoj konkurenciji najbolji su: Melisa Kamberović (ŽOK "Gračanica") i Mirza Hasičić (Karate klub "Gračanica"); najuspješniji juniori su: Alma Zekić (Krate klub "Dado Alić" Miričina) i Hazim Iljazović (Nogometni klub "Bratstvo"); najbolje ekipe su: Ženski odbojkaški klub "Gračanica" i Nogometni klub "Bratstvo" Gračanica; najbolji sportisti su: Alisa Sarajlić (Karate klub "Gračanica") i Faruk Dizdarević (Malonogometni klub "Kaskada-Drvostil"); za najboljeg sportistu invalida proglašen je Ismet Đulić (Šah klub "Gračanica"); najbolji trener je Edhem Halilović (Karate klub "Gračanica"), najbolji rekreativac je Mirza Mašić (Teniski klub veterana "Gračanica"), a najbolji sportski radnik Fahir Numić (Rukometni klub "Gračanica-Index"; Posebna priznanja za razvoj sporta dobili su: mr. Muhidin Halilović iz Gračanice, Alija Bešić iz Doborovaca, Abdulkadir Šišić iz Gračanice, Suljo Mehanović iz Stjepan Polja, te preduzeća: "Drvostil", "Variplast", "Plamingo" i "Procom".

1. 3. 2006.

Kompanija "Širbegović" i na italijanskom tržištu

Ukupan prihod Kompanije u 2005. godini bio je oko 40 miliona KM, od čega je 37%

ostvareno na izvozu u Srbiju i Crnu Goru, Hrvatsku i Sloveniju. Potpisan je i prvi ugovor sa jednom talijanskom firmom o izvozu čeličnih konstrukcija. Time je označen izlazak ove kompanije na tržište Evropske unije.

31. 1. 2006.

**Trinaesta sjednica Općinskog vijeća
Gračanica: u znaku međusobnog
prepucavanja 14 vijećnika SDA i trojice
njenih pomagača s jedne i 13 vijećnika SDP
s druge strane**

Zavisno od situacije i tematike koja se nađe na dnevnom redu, sjednice Općinskog vijeća "prolaze" uglavnom u tom tonu, besplodnom natezanju, oštroj konfrontaciji kada su u pitanju lični interesi pojedinaca, lokalnih partijskih elita i elitica ili parcijalnim interesima pojedinih mahala iz kojih dolaze lokalni "narodni dužnosnici", dok pored njih prolaze skoro bez diskusije krupna pitanja kao što su ekološki problemi općine, rad inspeksijskih organa, bezbjednosna situacija i rad MUP-a itd. Po više sati dangubi se oko usvajanja dnevnog reda, "ubacivanja" svojih tačaka, pokretanju, raznih inicijativa, postavljanju važnih i nevažnih pitanja itd.

31. 3. 2006.

**Četrnaesta sjednica općinskog vijeća:
usvojene dvije odluke vezane za izuzimanje
građevinskog zemljišta**

Prva je Odluka o utvrđivanju visine naknade za pogodnost gradskog građevinskog zemljišta (rente), kojom se utvrđuje način izračunavanja naknade za 6 građevinskih zona gradskog zemljišta. Naknada iznosi od 1 do 6 % prosječne cijene kvadratnog metra korisnog stambenog prostora (u 2005. g) za jedan kvadratni metar korisne površine objekta koji će se graditi na tom zemljištu. Odlukom o utvrđivanju visine naknade za preuzeto građevinsko zemljište u državnoj svojini utvrđuju se procenti od prosječne ugovorene građevinske cijene jednog kvadratnog metra korisnog stambenog prostora koja se formira u 2005. godini.

Dvije predložene odluke vijećnici su vratili na doradu: Odluku o privremenom korištenju javnih površina i Odluku o utvrđivanju vrijednosti boda za izračunavanje komunalne naknade. Nije prihvaćena ni Informacija o vršenju inspeksijskog nadzora u oblasti urbanističko-građevinske, komunalne i zaštite okolice, sanitarne i tržišno-turističko-ugostiteljske inspekcije za 2005. godinu. Prihvaćen je Prijedlog plana upisa učenika u prvi razred Gimnazije "Dr. Mustafa Kamarić" i Mješovite srednje škole Gračanica u školskoj 2006/2007. godini, te izvještaji o radu i finansijskom poslovanju Centra za socijalni rad i Veterinarske stanice u Gračanici u 2005. godini.

10. 4. 2005.

**Vanredna sjednica Općinskog vijeća:
doveden u pitanje najveći infrastrukturni
projekat na općini poslije Dejtona – hoće li
se rekonstruisati putna mreža na općini –
na potezu načelnik Nusret Helić**

Iako je, nakon višemjesečne javne rasprave i opsežnih konsultacija u vijećima mjesnih zajednicama općinski načelnik sa svim mjesnim zajednicama bio potpuno usaglasio koji će se lokalni i drugi putni pravci i ulice u samoj Gračanici rekonstruisati i asfaltirati iz zaduženja općine Gračanice (cca 3,5 miliona KM na rok od 3 godine), usljed opstrukcija većeg broja vijećnika, koji su zahtijevali da se taj, već usaglašeni dokument (Odluka) izmijeni bez saglasnosti mjesnih zajednica, na vanrednoj sjednici Općinskog vijeća, koristeći svoje zakonsko pravo, Općinski načelnik kao predlagatelj, povukao je prijedlog odluke iz procedure, ne dozvolivši dalju raspravu u kojoj su do punog izražaja došli lični i parcijalni interesi pojedinaca ili neformalnih lobista. Time ipak nije dovedena u pitanje jedna od najvećih infrastrukturnih akcija na području općine Gračanica poslije Dejtona. Općinski načelnik je najavio da će postupiti u skladu sa svojim zakonskim ovlaštenjima i bez obzira na blokade i opstrukcije iz Općinskog vijeća, realizovati ovaj veliki projekat - na način i u skladu sa voljom građana, odnosno usagla-

šenim prijedlozima iz mjesnih zajednica.

Mnogo manje rasprave na ovoj sjednici vođeno je o Izvještaju o procijenjenoj šteti od nepogode koja je prouzrokovala pojavu klizišta i poplava na području općine Gračanica u martu 2006. godine. Prema zbirnom izvještaju, ukupne štete od martovskih nepogoda na općini procijenjene su na 413.800 KM. Sljedeći korak je iznalaženje sredstava i sanacija tih šteta.

25. 4. 2006.

Posječene lipe na gračaničkom keju i u haremu Ahmed-pašine džamije izazvale oštru reakciju građana

U organizaciji Medžlisa islamske zajednice Gračanica, a u sklopu priprema za rekonstrukciju i uređenje harema Ahmed-pašine džamije (postavljanje kamene ograde i izgradnja nekih pratećih objekata: mekteb, manje trgovačke radnje), izvršeno je uklanjanje (sječa) nekoliko stabala lipe na prostoru harema i, uz dozvolu nadležnog općinskog organa, tri stabla lipe na gračaničkom keju, pored samog haremskog zida, koji, takođe, treba da se izgradi i rekonstruiše, nakon čega će se, kako su najavile općinske vlasti, na tom mjestu odmah zasaditi nove lipe. U međuvremenu, Medžlis je zatražio odgovarajuće dozvole od nadležnog općinskog organa za izvođenje spomenutih radova, između ostalog i dozvolu za obaranje (sječu) starog stabla lipe koje je izraslo u ogradi (zidu) sa istočne strane harema, s obrazloženjem da prijeti opasnost od njegovog rušenja, da stablo oštećuje fasadu džamije, oluke itd. Iako se o potrebi uređenja tog prostora govori već nekoliko godina, ove konkretne "građevinske aktivnosti" u najužem centru grada (na objektima koji su još uvijek u proceduri za sticanje statusa nacionalnog spomenika), izazvale su oštru reakciju građana, koji javno osuđuju rušenje lipa, kao simbola Gračanice i od lokalne vlasti zahtijevaju da sve to zaustavi. Oštroj kritici javnosti izloženi su, kako članovi Medžlisa islamske zajednice (među kojima neki "peru ruke od svega"), tako i nadležni općinski organi, od kojih se očekuje "da po-

stupe u skladu sa zakonom". U sve to, napokon, umiješala se i lokalna politika, konkretno političke stranke, koje miris gračaničkih (posječenih) lipa već koriste u svom predizbornom zagrijavanju, ali i za namirivanje nekih zaostalih "sitnijih računa". Općinska vlast se tako iznenada našla u "sendviču" između zvaničnog zahtjeva i namjera Medžlisa Islamske zajednice da uređuje i ograđuje prostor oko Ahmed-pašine džamije i oštre reakcije građana i javnosti koja zahtijeva da se to zaustavi.

Ako sve ovo ubrza donošenje kvaletetne urbanističko-planske dokumentacije za centar grada Gračanice, možda će biti i neke koristi od ove štete.

28. 4. 2006.

Asfaltiran put Gornji Drafnići – Žuže

...u dužini od 3000 metara. Uloženo 309 KM. Sredstva obezbijedila općina iz Budžeta, građani dobrovoljnim prilozima, te nekoliko gračaničkih privrednika

28. 5. 2006.

16. sjednica Općinskog vijeća: gračanička glavna "džada" ne nosi više ime svoga graditelja Ahmed-paše Budimlije, voljom Vijeća, preimenovana u ulicu Alije Izetbegovića; postignuta nagodba – načelnik općine korigovao program rekonstrukcije lokalne putne mreže

Centralnu ulicu u Gračanici, koja je nosila ime Ahmed-paše Budimlije, osnivača gračaničke čaršije, graditelja sahat-kule, medrese i čaršijske džamije, Općinsko vijeće preimenovalo je u ulicu Alije Izetbegovića, prvog predsjednika Predsjedništva Bosne i Hercegovine. Donoseći tu odluku, usvojilo je i zaključak da se sadašnja ulica Fridriha Foglara (kej) preimenuje u ulicu Ahmed-paše Budimlije iako je Komisija za obilježavanje značajnih događaja i ličnosti imala drugačiji prijedlog: da se sadašnja ulica Mehmeda Drugog Fatiha u centru grada preimenuje u ulicu Alije Izetbegovića.

Nije ovo prvi slučaj da se mijenja ime glavne gračaničke džade. Nosila je nakad ime kralja Petra Oslobođioca (sa trgom kra-

ljice Marije, na mjestu sadašnjeg centralnog parka), zatim ime poglavnika Ante Pavelića i, napokon, ime narodnog heroja iz Drugog svjetskog rata Todora Panića (mučki ubijen četničkom rukom). Ironijom sudbine i voljom vijećnika ovog saziva Općinskog vijeća, izuzimajući period Ante Pavelića, ponajmanje vremena u svojoj historiji dičila se imenom svoga graditelja Ahmed-paše Budimlije, nešto manje od deset godina. Stoga mu i ponudiše, valjda za "utjehu", staru švapsku gračaničku "štraftu" s lijeve strane Sokoluše. Tako će i ova ulica izgubiti ime svoga graditelja Foglara, a dobiti ime Budimlije, koji sa tom ulicom nema nikakve veze.

Graditelji su i ovoga puta loše prošli, a građani...? Njih se ionako nizašta ne pita.

Nakon povlačenja prijedloga Plana izgradnje putne infrastrukture na području općine u 2006. godini iz budžetskog zaduženja u iznosu od cca 3,5 miliona KM na rok od tri godine sa prethodne sjednice Općinskog vijeća, Općinski načelnik Nusret Helić je nastavio konsultacije sa predstavnicima mjesnih zajednica i na ovoj sjednici izašao sa nešto izmijenjenim i usklađenim prijedlogom Plana koji je dobio potrebnu većinu na ovoj sjednici.

Slijedi ubrzano raspisivanje tendera i početak realizacije jednog od najkrupnijih infrastrukturnih projekata poslije Dejtona na području općine Gračanica. Planirana je rekonstrukcija i asfaltiranje većine gradskih ulica, te preostali dio lokalne putne mreže na općini u ukupnoj dužini od oko trideset kilometara.

9. 5. 2006.

U Gračanici trajno obilježena Srebrenica

Otkrivanjem obilježja i promovisanjem imena "Parka žrtava genocida u Srebrenici" i Gračanica se pridružila onim gradovima Bosne i Hercegovine koji su trajno obilježili

uspomenu na stradanje tog nesretnog grada. Riječ je o dijelu parka ispred zgrade općine, koji će se održavati u skladu sa imenom koje je ponio i trajno podsjećati Gračanlije i sve one koji budu dolazili i prolazili ovim gradom na Srebrenicu i njeno stradanje.

Otkrivajući obilježje, načelnik općine Gračanica Nusret Helić je objasnio simboliku nekih detalja u "Parku žrtava genocida u Srebrenici": cvjetne gredice u obliku kapi krvi, zasađene crvenim ružama simboliziraju genocid izvršen u Srebrenici, uspravna sadnica četinara, oko koje su raspoređene juke, simbolizira ožalošćenu, ali i dalje uspravnu, gordu majku Srebrenice, oko koje su djeca i unuci, potomci poginulih i stradalih, platan u pozadini, simbol je snage srebreničkog naroda i konačno, stablo žalosnog duda – simbol je žalosti i tuge, našeg saosjećanja i pijeteta prema žrtvama Srebrenice.

Bio je to tužan i dostojanstven događaj u Gračanici, kojem su, pored brojnih Gračanlija i učenika gračaničkih srednjih škola, prisustvovala i majke Srebrenice, podsjećajući na planetarnu nepravdu, genocid i stradanje svojih najmilijih, tragičnog ljeta 1995. godine, kada su srpske snage zauzele Srebrenicu kao zaštićenu zonu Ujedinjenih nacija i nakon toga likvidirale više od 10.000 Bošnjaka iz Srebrenice i okolnih gradova.

Prije otkrivanja obilježja, u Bosanskom kulturnom centru otvorena je izložba dokumentarnih fotografija o Srebrenici, autora Ahmeda Bajrića Blicka, a potom, u velikoj Sali predstavljena knjiga "Srebrenica - dokumenti o genocidu" i dokumentarni film o stradanju Srebrenice, autora Mehmeda Pargana.

I sa ovog skupa u svijet je otišla jedinstvena poruka: pravda za Srebrenicu, pravda za Bosnu i Hercegovinu.